

名

山

藏

名山藏卷之五

臣何喬遠恭

典謨記 革除記附

建文君者懿文皇太子次子而高皇帝孫也懿文太子先高帝薨高帝崩君以太孫嗣紀年建文畏諸王強大用齊秦黃子澄計誅鋤之諸王皆恐燕王曰奸臣害我乃以叔父興師誅秦子澄師名靖內難四年靖難師入都君闔宮自焚臣民推燕王爲皇帝擯君年紀不用以未改元之年屬之洪武令稱建文君也君名允炆生而偏頗高帝弗喜成童聰穎能詩使賦

新月曰庶其免乎初懿文太子仁柔亡武君亦文弱  
好詩書不任法律太子薨高帝屬心燕王以學士劉  
三吾言乃立君爲太孫使預政太孫時時尚寬大中  
外有欣欣之心高帝末年其諸子存而壯者成祖若  
周王橚皆與太子同出高皇后胡妃子楚王橧達妃  
子齊王榑郭妃子蜀王椿代王桂谷王榑胡妃子湘  
王柏部妃子肅王模韓妃子遼王植余妃子慶王櫟  
楊妃子寧王權周妃子岷王榑始高帝王諸子多國  
邊陲以爲陞固今置三護衛其王中原者亦皆有土  
大方太孫旣立諸王以兄子易之太孫以爲憂嘗謂

其傳黃子澄曰諸王皆尊屬擁重兵卽陛下千秋萬  
歲後曷制之黃子澄曰諸王雖有三護衛僅足自固  
明兵滿天下其孰能當太孫曰善高帝大漸以齊泰  
爲兵部尚書受遺詔洪武三十一年閏五月辛卯太  
孫卽皇帝位以其明年爲建文元年大赦天下其日  
葬太祖高皇帝孝陵止諸王會葬是月也以兵部尚  
書齊泰太常寺卿黃子澄參軍務七月召漢中府教  
授方孝孺爲翰林院侍講賜禮部右侍郎董倫孫凡  
王鳩董倫字安常宛平人自爲儒士處山林閒服舊  
朝衣國初以爲資善大夫事懿文太子其所陳  
多忠厚之言太祖聞而善之起遷左  
春坊大學士太子薨出爲河南參議周王子有燭告

其父補反使曹國公景隆執王及世子京師詔諸王  
議其罪燕王爲周王請寬若語泰子澄莫若且止泰  
子澄出詣諸縣官婦人之仁耳乃廢周王爲庶人徙  
蒙化置世子臨安十二月朔官牲郊壇詔求直言舉  
山林巖穴材德之士齊府人告變召齊王還京君晏  
朝監察御史尹昌隆諫道曰朕過也示昌隆諫書天  
下與天下明知朕不德釋所在黥徒還鄉元年正月  
將有事於南郊奉太祖高皇帝配戊寅御奉天殿誓  
百官之蒞於文華已卯舍皇邸庚辰子夜脫舄行禮  
未竟還朝受賀詔奉老賜高年米絮帛有差命官贖

民粥子減田租告卽位于天下神祇勅修太祖實錄  
徵處士楊士奇二月諡太祖高皇帝孝慈皇后高皇  
后追尊皇考爲孝康皇帝廟號興宗皇妣懿敬皇太  
子妃爲孝康皇后冊妃馬氏爲皇后封弟允熲吳王  
允禔衡王允礽徐王立皇子文奎爲太子詔曰祖宗  
廟諡稱號所以褒顯功德薦之天下後世不宜諱自  
今諱廟諱廟諡稱號勿諱山林巖穴有才德廉能之  
士有司以實聞軍民年八十以上亡男女者賜一石  
米十斤肉二斗酒九十者加一帛一斤綿犯杖以上  
及嘗爲隸優者不與鰥寡孤獨貧無告者歲給米三

石親戚養之無親戚者里隣相收卹田荒不可治者  
除其賦義夫節婦孝子順孫及同居五世以上者有  
司以聞不能嫁娶喪葬者部伍隣族相資助民罹災  
者速賑濟軍中孤兒廢疾無養及老有代者一體撫  
綏還鄉自便者聽前代兵後骸骨春時揜埋毋令其  
露衛所軍戶絕者除勿勾是時齊泰黃子澄言自今  
親王有罪者請輒除其國諸藩猜望甚而君日與孝  
孺輩稽古用周官變更高帝制定品官階勳正一品  
更特進資政上卿從一品更資政卿其餘各爲大夫  
士有差正一品以六部尚書處之尚書以下增左右

侍中各一人位侍郎上省戶刑二部司爲四戶部民  
司度支司金帛司倉庾司刑部祥憲司比議司職門  
司都官司罷稱司爲清吏罷左右都御史設都御史  
一人副僉都御史各一人更通政司曰寺使曰通政  
卿通政參議曰少卿寺丞增置左右補缺左右拾遺  
各一人更置大理寺曰司卿曰大理卿左右寺正曰  
都評事副曰副都評事司務曰都典簿更太常寺卿  
曰太常卿少卿寺丞分左右更天壇祠祭署曰南郊  
祠祭署泗州祠祭署曰泗濱祠祭署宿州祠祭署曰  
新豐祠祭署更光祿寺卿曰光祿卿少卿寺丞分左



右陞少卿秩從四品省署丞二人更太僕寺卿曰太僕卿增少卿寺丞各一人增典廩典牧二署署隸二羣曰驕駃十五羣曰遂生三羣更鴻臚寺卿曰鴻臚卿少卿寺丞分左右增翰林院承旨一人學士一人省侍講侍讀學士置文翰文史二館除六科左右給事中除左右布政使設布政一人更按察司曰肅政按察司增親王官賓輔二人秩三品伴講伴讀伴書各一人郡王賓友二人教授一人見王郡王坐禮焉如賓師贊謁名不臣是月也燕王與其世子諸子來朝行皇道登陞不拜監察御史曾鳳韶戶部侍郎卓

敬上劾不報三月丁亥帝祀先師聽講太學賞師生  
幣鈔有差命戶部右侍郎夏原吉等二十四人充採  
訪使行天下問民疾苦興廢黜貪得便官行事是月  
燕王還國燕世子及諸子高煦高繼畱京師北平按  
察使李湯宗告按察使陳瑛密受燕府金錢詞連右  
都政使昱按察副使璉俱逮繫詔獄譴削有差燕王  
議衛百戶倪諒上變連府中官旗諒鐸等皆逮訊伏  
誅敕都督宋忠調邊軍三萬屯開平悉選燕護衛隸  
其麾下召燕胡騎指揮童等還京調北平永清二衛  
軍於歸德順德以都督徐凱練兵臨清都督耿獻纘

兵山海關皆以備燕四月齊王告變事連湘王柏君  
使讓之湘王怒焚宮赴火死遂廢齊王爲庶人幽之  
誅其護衛指揮真等亡何代王桂岷王梗皆得罪復  
竝廢爲庶人竝幽之諸王旣多得罪燕王最長名最  
盛亦被詰讓齊泰黃子澄與魏國公徐輝祖等日夜  
謀防燕矣君因以工部侍郎張昺爲北平布政使謝  
貫爲北平都指揮監燕燕王佯狂爲涇舌稱病甚燕  
指揮盧振長史葛誠常告燕陰事於昺貫昺貴人問  
燕王病王重裘擁爐見之猶顫因上表臣久病無侍  
子請遣臣子之留京師者齊泰曰盍收焉黃子澄曰

不可疑而備之殆也乃皆遣歸居頃之燕王使其百  
戶庸詣闕奏事齊泰請執訊之庸誣服因飛符昺貴  
令與都指揮張信密擒王官較昺貴等約盧振葛誠  
居內都督宋忠居外舉事有日張信以爲憂信母疑  
而問之驚語曰不可不聞而父之言乎王氣在燕分  
燕王當有天下六月昺貴圍王城柵端禮門殺王卒  
矢入於城中未幾詔削燕王爵密勅昺貴等收王張  
信請見王三不可乃乘輜輶入王見其白身來許之  
信入拜牀下王爲瘖信曰殿下無然有事當語臣王  
搖首指腹信曰殿下猶不誠語無意乎上擒王矣當

就執如有意請告臣也王下拜曰一家之命皆在子  
矣七月壬申王稱疾愈出會宮僚盡如中朝所坐官  
較縛置庭中召昺貴曰罪人得矣則取去昺貴至門  
者內之呵止其從人王杖見昺貴會進瓜王食瓜怒  
且詈曰今編戶齊民兄弟宗族尚相恤身爲天子令  
親屬叔父旦夕莫必其命縣官待我如此天下何事  
不可爲乎因擲瓜於地護衛軍皆怒前擒昺貴捽盧  
振葛誠等下殿王投其杖曰我何病迫於若奸臣耳  
我何病遂曳斬昺貴等夜攻下九門北平指揮俞瑄  
走居庸馬宣走薊宋忠自開平率兵至居庸聞事敗

退保於懷來陷瑱守之燕王上書曰臣聞書曰不見  
是圖又曰親遠惟明今事幾甚苦陛下畧不垂察臣  
竊感之當元之末生民塗炭羣雄角逐皇考太祖皇  
帝披霜冒露東征西伐赴矢石被創痍艱難百戰然  
後定天下封建諸子鞏固宗社爲磐石之安不幸竇  
天陸丁嗣登大寶奸臣齊泰黃子澄輩包藏禍心爲  
謀以誤陛下楠樛柏桂梗五弟雖有縣愆未聞不軌  
重可裁減護衛輕可賜勅誠屬乃動見削奪轉徙流  
離行道嗟歎柏尤可傷不得良死今尚未厭又以加  
臣臣守藩二十餘年事君之誠明于皎日奸臣跋扈

蔽明害公執臣奏事之人筆榜棘藿迫其告變分布  
宋忠張昺謝貴於內外圍守臣府臣之一家如臨湯  
火已而貴昺爲護衛所執始知其出奸臣之謀臣聞  
伐大樹者必先剪旁枝危君室者必先除公族朝廷  
孤立社稷危矣不待明者而後見也高帝祖訓曰凡  
新天子卽位朝無正臣內有奸惡則親王訓兵待命  
天子密詔入誅之臣謹領鎮兵俯伏待命以遵皇祖  
之訓惟陛下念之周廣同姓綿祚八百肅人孤獨二  
世而亡明鑒斯在詩曰价人維藩大師維垣大邦維  
屏大宗維翰懷德維寧宗子維城無俾城壞無獨斯

畏易曰大君有命開國承家小人勿用惟陛下念之  
書上不報丁丑燕王大諭將吏起兵靖難次通指揮  
勝等以通降王使其將指揮能等攻薊指揮安等攻  
居庸皆拔之生擒馬宣僉璵走依宋忠於懷來王與  
其將馬雲徐祥攻之宋忠佯言怒其將士曰公等父  
兄家北平燕盡殺之矣速報仇諸軍或疑或怒燕王  
使其前鋒用家幟先登城中子弟望見幟皆喜無關  
心忠敗奔入城急匿廁燕軍捕出之并獲璵兵勢大  
振於是山後諸州皆不守而開平龍門上谷雲中守  
將往往降附矣谷王穗震驚率眷屬奔于京師是時



遵化密雲永平指揮皆以城降都督劉貞陳亨都指揮卜萬引大寧兵出松亭關以攻遵化萬智而勇貞異而懦而亨有二心於燕王獲二卒遣之爲書置一卒衣中多予之金使獻書於萬若與通者而其一卒無所賞卒志歸訐於貞貞搜卒書執萬以聞君籍萬家下之獄是月也告天地宗廟社稷削燕屬籍詔天下以長興侯耿炳文爲征虜大將軍駙馬都尉李堅都督竇忠爲左右副將軍帥師三十六萬北進安陸侯吳傑江陰侯吳高都督指揮盛庸潘忠楊松顧成徐凱李文陳睢平安等益出偏師佐炳文置平燕布

政司于真定刑部尚書暴昭掌之八月炳文師至真定徐凱次河間潘忠楊松守鄭忠松使其先鋒九千餘人屯雄燕王屯樓桑晡食士戾白溝夜圍雄雄人登陴罵北軍遲明燕綠雄屠之忠松來援燕將譚淵領兵千餘過橋蒙茭伏水中使勇士要戰於路隅伏出水據橋二將無所退保皆被擒燕王遂自將百餘騎趨鄭盡降南軍還軍白溝自引精騎直趨真定西門下燬其二營炳文覺起門橋橋紉斷於北軍乃出戰王以奇兵擊炳文背炳文奔北入城卒闔門不得入自相斷乃入燕騎士祿剽馬堅墮馬獲之甯忠

顧成及都指揮劉遂俱見執死者三萬人炳文入城  
堅壁北軍攻之不下引還君大怒曰老將也而摧鋒  
黃子澄對曰亡憂勝敗兵家之常耳君曰雖然孰堪  
更將子澄曰曹國公景隆可比用景隆今破矣乃拜  
景隆大將軍其行也帝親餞之江渚賜諸將犀玉帶  
有差齊泰言遼寧地近燕請召還二王從之遼王至  
寧王不至君怒削寧王護衛監察御史韓郁上言曰  
臣聞人主親其親不獨親其親臣歎陛下愛諸王之  
至待諸王之厚而諸臣不體也凡見藩封太重疑慮  
太深者豈儒耳諸王親太祖遺體也而貴孝康皇帝

手足尊陛下叔父也太祖遺體則不可使賤親之手  
足則不可使缺陛下叔父則不可使絕也高皇帝孝  
康皇帝爲天子子與弟以爲戮在天之靈安乎臣念  
至此未嘗不流涕也夫亡唇寒齒舐糠及米言者曰  
二叔流言周未嘗不誅也六國反叛漢未嘗不削也  
遂使周王播遷父子流離於是齊王廢湘王焚代王  
遣岷王又見告矣諸王自爲計必曰兵不舉禍必結  
是陛下激之也燕王舉事兩月矣前後調兵不下五  
十餘萬有一矢之獲乎經營已久軍興輒乏將士挺  
敗徒令中原赤子困於輸戰九重之憂方深帷幄之

計周微曰善一日語曰親者割之不斷疎者續之不  
堅臣恐陛下不察不待十年必有噬臍之釁伏惟興  
滅繼絕釋齊代岷之囚封湘王之墓還周王京師迎  
楚蜀爲周公偉各命世子持書勸燕罷兵守藩以慰  
宗廟之靈明詔天下撥亂反正篤厚親親宗社幸甚  
不聽前斷事高巍請得自使燕說燕王君使參贊景  
隆軍九月景隆至德州收炳文敗卒得五十萬進營  
河間江陰侯吳高都督耿璫楊文以遼東兵圍燕永  
平燕王出師援永平而誠世子居守曰景隆來堅守  
毋戰也燕王奔至永平吳高不及軍退保於山海十

月燕王將出師南向慮寧王躡其後乃自永平北攻大寧時劉貞陳亨悉兵守松亭關燕王徑道卷旆登山從後攻度關至大寧城西門崩剋之獲都指揮房寬殺卜萬於獄而都指揮朱鑑戰死貞等引軍還援燕王已入城平定其衆與寧王置酒高會陳亨竟夜襲破劉貞營率其衆降燕燕王居大寧數日欲得胡酋兀良哈等助戰陰令帳下士說之與俱西諸胡酋長皆喜王班師寧王餞之郊兀良哈之酋擁寧王入關寧王三護衛軍皆歸於燕燕王置寧王軍中分隸諸胡若護衛爲五軍使諸將張玉朱能等將之而勢

遂盛景隆聞燕之攻大寧也自河間移軍薄燕壘其  
九門別遣將攻通自營鄭壩待王南軍攻麗正門急  
燕盡出婦女乘城轉蘭石都督瞿能與其二子帥騎  
千餘戰入張掖門景隆密止之退十五里而軍燕世  
子令夜汲水澆城水隔於壩南軍無復能登者而景  
隆所遣別將亦敗於通十一月燕王自大寧還景隆  
軍鄭壩陣而待王白迷之西白迷之河流王心禱曰  
河水則天相燕也其日雪河水燕王盡以其師度南  
將陳暉追躡之王還擊暉暉敗跳水遁水乃皆解王  
連破南軍七營與景隆戰午及酉景隆大敗燕斬南

軍十餘萬降如之都督火真焚敝羈以煖燕王鎧者  
趨焉楯人呵之燕王曰止是皆壯士其夜景隆遁德  
州燕王還攻南軍之圍九門者破其四營遂入北平  
是時君論岷王罪流之漳州誅其府典膳世英等燕  
王旣還北平復上書白心傳檄天下檄曰惟父皇太  
祖高皇帝一統華夷爲生民主天下底定立長子爲  
皇太子餘子無嫡庶皆裂土封王爲子孫不拔之計  
豈期數年以來太子薨逝秦晉二王繼卒父皇念太  
子早世立其次子爲太孫不幸父皇賓天太孫卽位  
我諸王表奏稱賀頓首頓首百拜萬死謹言不敢居



叔父冲年信惑邪蠱任用貪墨猾吏爲左班文臣盡  
屏棄典刑殘害骨肉穢德感怒于皇天京師地震十  
川山崩水溢火焚其土庫二月霹靂大風雨發屋拔  
木蝗蟲生隴畝占書曰地德至靜不宜動搖若主弱  
臣強則必震動臣下擅權則土不寧變怪生焉陽伏  
不能出陰出不能入陰陽相激地必震動動於宗廟  
宮殿者人君失信國無忠臣誅伐不以禮上下不相  
親也山崩水溢者五行失序也此公輔之象賢人退  
小人進則山崩山無故自崩國易政人主失位民流  
散也天火焚土庫者賞罰不明也燒宮室者君不思

道厥妖火燒宮也霹靂大風雨發屋拔木者讒言殺  
正士也蝗蟲生隴畝者邪臣在位則蟲食苗葉君用  
才不當臣不任職則蟲食苗莖佞臣在朝則蟲食田  
苗任用奸賊則蟲食苗根也天戒甚明猶不恐懼此  
皆齊尚書黃太卿左班文職佞君殃民專事滅親以  
致於此患也父皇不豫勅召我奸臣齊尚書匿之及  
大漸數數問第四子來未至涉遐又不卽計我諸子  
至今不知父皇得何病嘗何藥濱於大故禮三日而  
斂翼復生也父皇亥時崩寅時斂不知何此速也禮  
天子七月而葬父皇停棺不中殿七日葬不知何此

速也宮車宴駕遺詔一月始至是我親王與庶民同也宮車未葬壞宮掘地五尺改移之不知父皇何過也齊尚書奏曰凡朝几筵揖不拜小祥節祭帝不用親行衆王遣奠京師囚繫其使者鍛鍊令誣王何禮也高皇帝祖訓曰王月閱士或十過或七八過或五六過王朝從行文武官吏馬步騎軍亡筭旗幟甲仗皆上鮮明以壯臣民之觀洪武二十五年春父皇召諸王入宮親受勅王歲訓將練兵周視封疆作軍器必精良勅尾記洪武年月日帝御奉天門口占翰林院修撰練子寧許觀編修吳言信三員執筆書孫允

炊親目之曰使奸邪不得口舌惑聽太祖皇帝令守  
藩諸子歲振伍繕士豈導之他不利哉褒廣輔拂防  
虜遏邊令帝業萬世也奸臣齊尚書黃太卿左班文  
臣不遵祖勅恣行奸宄誣陷親王以流言破滅周王  
父子異竄未旋踵而罪代王出其奸娥皆配於軍譙  
讓湘王賜之赭死齊王亡罪儻在囚拘私持金帛陷  
岷王之人趣爲飲章以禦魑魅嗚呼齊尚書黃太卿  
奸臣小人昔事父皇幸追天誅備於左班恣奸用謀  
殺我父皇子孫我父皇能復幾子更須幾歲月不盡  
於虔劉齊尚書等又使惡少年貴曷監燕誘我長史

誠圖我蕭牆截我端禮行門殺我城卒使我坐食不  
安我飲泣如弗聞上秋之旬約來攻我我懼要領之  
不沒我護衛之士同心爲我擒逆都指揮忠等又領  
兵二萬三千次於懷來約來攻我我懼要領之不沒  
我精騎八千同心助戰大敗忠軍獲馬六千生擒三  
將降其餘黨奸臣又行矯詔俾長興侯炳文等領軍  
三十萬次雄真定約來攻我我懼要領之不沒我軍  
士同心迎敵遂以八月中旬破雄斬首九千餘級獲  
馬三千生擒都督忠指揮松居九日大破炳文真定  
斬首五萬獲馬五萬二千餘匹生擒左副大將軍駙

馬堅右副大將軍忠左軍都督成都指揮遂餘將悉  
下歸之於故伍江陰侯高都督璫都督文領軍遼左  
入自永平約來攻我我懼要領之不沒我騎士三萬  
九千同心并行高等聞風夜遁追斬首級千餘於百  
里之外我臨大寧諭以太祖皇帝舊恩房寬歸命鑑  
萬授首我精騎三萬襲破都督貞都督亨於松亭大  
寧以平奸臣又行矯詔使曹國公景隆領兵五十餘  
萬入逼北平攻我我懼要領之不沒我士同心以寡  
敵衆戰敗景隆斬首一十五萬九千餘級餘衆悉下  
歸之於故伍景隆夜遁去余無孫吳之畧然所向克

捷者天地祖宗鑒予忠孝本心憐而佑之也昔靖江王守謙其父文正身多愆違王復不改父皇篤念懿親尚行爵出祿與同享之周齊湘代岷五王合氣同天風聞無實齊尚書等助君爲虐必欲盡劉之心將圖天下也余太祖高皇帝孝慈高皇后親子皇太子親弟而衆王親兄禮曰父讐不共天兄弟離不反兵奸臣齊尚書黃太卿實離余父離余兄弟余用帥領精兵三十萬誅討余父兄弟離天下臣吏尚追念高皇帝同心戮力共行擒捕獻俘于玄祖使我父皇子孫基業以萬世十二月燕王閒江陰侯吳高於朝削

高爵安置廣西燕王出師攻大同至廣昌降其將勝  
薊州鎮撫曾瑋起兵攻北平死之衛官張倫等盟兩  
衛軍勤王是月也從軍中加李景隆太師賜璽書專  
征之鈇鉞使者失船璽書鈇鉞皆沉於江以如常爲  
兵部尚書罷齊泰黃子澄報燕建省躬殿藏古經聖  
訓使方孝孺銘遷肅王檠蘭州法司奏今歲論囚減  
往十之三使者還自西方得雪山青玉二年正月燕  
王攻蔚降之轉攻大同李景隆出援紫荆關王從居  
庸還甲子詔曰頃以庶獄煩興易御史臺曰都察院  
分章刑部宗廟神靈民服于平爭訟頗簡其視漢制



更都察院爲御史府御史員可省至二十八人糾劾  
殘舉循良匡政事宜助教化務忠厚以底治平三月  
戊辰賜御史衣移御史府便朝謁四月燕王出師南  
向癸丑李景隆自德州進河間郭英平安吳傑自眞  
定進保定合軍六十萬期於白溝燕王自固安度拒  
馬河營蘇家橋雨甚王坐胡牀待旦兵端有火光金  
鐵弓弦皆鳴己未燕王視天出軍有五色雀飛駐旗  
竿之首遂率軍循河西北行平安與翟能出伏要戰  
北軍皆却王自夾擊其後敗肅軍及白溝景隆與燕  
王遇自暮至暝兩軍從火光中苦戰收軍燕王逃所

壁處下馬視河流乃辨方從王者三騎庚申燕復渡  
河瞿能與其子擣房寬陣平安翼之擒斬北軍數百  
人燕將丘福以萬騎衝南軍殊堅王以精騎突入南  
軍左掖南軍復繞出王後連戰百餘合南軍矢如雨  
燕王馬三創三易王射矢盡三橐提劍左右擊劍缺  
瞿能迫馬阻於重堤王馳逆之佯提鞭後招能軍疑  
乃稍已不前平安創陳亨劍及徐忠兩指忠自斷擲  
之累益而戰高煦帥精騎數千與王合彼此相扼至  
日中瞿能大呼滅燕入北軍斬其數百騎越雋侯俞  
通淵指揮滕聚亦前會旋風起折大將之旋南軍相

視而勦燕王乃與高煦乘南軍乃斬能父子於陣平安與朱能戰乃亦不利通淵聚亦沒於陣中景隆軍大潰喪師殆三十萬人還奔德五月拔其衆奔濟南燕王入德德降使將旭守之追擊景隆濟南城下大敗之遂圍濟南堤水灌城參政鐵鉉令軍中詐降燕迎燕王入約其壯士懸鎖槌伏城上聞則使守陴之卒晝夜哭曰濟南魚矣亡無日矣乃撤守具出居民伏地請曰奸臣不忠使大王冒霜露爲社稷憂誰非高皇帝子誰非高皇帝民臣其降也然東海之民不習見兵大軍壓境不識大王安天下子元元之意或

謂聚而殲之請大王退師十里單騎入城臣等具壺  
漿而迎大王燕王大喜如濟南民言馬過城下城下  
呼千歲聲聞於闔槩及王馬首王驚改馬而馳濟南  
人挽梁梁則堅燕王竟從梁馳去復圍濟南城六月  
增改詹事府增少卿寺丞各一人賓客二人增置資  
德院設資德一人資善二人其屬贊讀贊書著作郎  
各一人掌籍典簿各一人增司業各二人省博士學  
正學錄增助教十七人是月也以李景隆屢敗遣尚  
寶司丞李得成構燕王泣曰吾兩上書矣而不見  
報親王下天子一等吾何求哉直自抹耳得成不得

書還口報君怒其辱命囚之已乃釋召景隆還以左都督庶庸爲平燕將軍右都督陳暉平安爲左右副將軍馬溥徐真爲左右參將帥師征燕平安出兵二十萬奪北軍之餉於單橋遣沒者五千渡河與庶庸合攻德燕將旭遁歸復有德諸縣八月燕聞德破引濟南之師還是月也承天門災詔求直言九月重成焉改曰臯門遂改午門曰端門端門曰應門前門曰路門改謹身殿曰正心殿置學士一人罷華蓋殿文華殿武英殿文淵東閣大學士各設學士一人改侍讀學士爲文學博士以方孝孺充之十月論守濟南

功擢鐵鉉山東布政使進兵部尚書封戚庸歷城侯  
李景隆還黃子澄曰景隆觀望喪師當誅御史大夫  
練子寧執而數之朝以哭請卒不問景隆闕機以應  
燕故其戰不善也平安次定州與燕將陳亨戰華山  
斬之徐凱陶銘次滄盛庸次德燕王下令曰攻遼東  
至通令士皆循河南北軍疑曰征東何南也燕王曰  
夜有白氣二道自東北指西南占書曰利南乃自直  
沽疾行三百里至滄城下掩擊之凱銘皆降燕燕渡  
河南至德王殿軍盛庸覘之堅壁待師過襲之燕王  
還擊殺百餘人遂自臨清移軍館陶取糧焚舟至冠

向東平山西戍卒羅義扣燕投書請罷兵復詣闕上  
奏天子當篤親親厚諸父已北征之役君不悅下之  
獄而詔曰得燕王者毋傷也使朕有殺叔父名十二  
月盛庸營東昌先鋒霖以軍五千營滑口燕王使其  
將朱榮劉江襲破霖遂至東昌己卯盛庸椎牛享士  
背城而陣前其火器精兵燕王突入其左翼旁空北  
軍鼓譟繼之盛庸盡乘以火器北軍大亂庸與平安  
麾旗大戰斬燕將張玉園王數匝燕將朱能朱長率  
胡騎從東北角奮擊南軍南軍萃東北燕王從西南  
遜去閒道還北平三年正月辛酉疑命神寶成君親

定其文曰天命明德表正萬邦一執中昌

初君爲太孫夢帝致寶焉旣卽位得青玉雪山二年  
齋郊宮夕夢若有寤乃命玉人琢爲大璽至是以告  
天地宗廟下詔百官稱賀大宴奉天門賞四夷朝使  
辛未大祀南郊明日行慶成禮令羣臣賦詩頌天下  
歷城侯庸來獻東昌捷丁丑告郊廟召齊泰黃子澄  
還燕王歸而爲無遮之會以薦亡士王莅會大哭解  
袍焚之曰雖其一絲以識余心乃復募士南向三月  
盛庸以兵二十萬出德吳傑平安出真定自單橋進  
營夾河燕王亦從保定緣滹沱去盛庸四十里而舍



以數騎覘庸軍庸覺追之王射殪其一人又追又殪  
之及戰庸軍蔽盾自堅北軍投以木積積貫丁寧有  
旋鈎焉南軍盾胷於鈎皆棄之北軍乘之都指揮莊  
得殺燕大將譚淵及其部將數人死之楚智亦死之  
張皂旗亦死之張皂旗者常以皂旗先登北軍畏焉  
呼曰皂旗張及死猶手其皂旗壬午盛庸軍西南燕  
王軍東北又戰自辰及未疲坐地息起復戰忽東北  
風起北軍乘風橫擊南軍昏不辨死者十萬餘人燕  
王追奔至滹沱盛庸復還德戰之夕也燕王迫南軍  
而次晨鳴角穿營徐去無敢犯者以詔毋使有殺叔

父名也是月也逐齊泰黃子澄籍其家吳傑引兵至  
聞庸敗乃復還真定閏三月自真定出藁城己亥大  
戰矢集王旗如蝟平安登陣譙望戰見其軍勝鼓之  
燕王趨之平安下譙而遁會大風起發屋拔樹南軍  
死者六萬餘人燕狗順德廣平大名君使告燕王曰  
齊泰黃子澄賊臣無功雖皇帝亦惡之已竄逐籍其  
家皇帝所以爲燕王足矣可罷兵燕王上書曰臣聞  
虞舜首去四凶殷湯改過不吝帝王之盛美萬世所  
師法也臣奉藩二紀不敢違越奸臣齊泰黃子澄懷  
莽操之逆圖志傾宗社造滔天之孽翦藩輔之親屢

削諸王次及於臣欲陷臣家竝寘死地臣瀝懇號天  
天聽甚高古云大杖則走陛下所以杖臣大矣以兵  
自防非臣得已上賴天地宗廟鑒臣衷誠憫臣非辜  
大軍見臨輒自摧衄臣不敢爲喜輒用傷悼誠念皆  
皇考之民橫被奸臣驅之白刃彼實何辜是以夙夜  
控額天地祖考之靈冀開聖明助震威斷比聞二奸  
皆已竄逐臣之一家鼓舞更生臣下令三軍將士天  
其悔禍可以釋憾三軍將士且恐且喜合慮同詞前  
告于臣二奸雖逐大兵未退名爲格倭實用弛謀亦  
人事之或然者也臣恐陛下未推豚魚之仁尚惑樊

棘之聽此非獨撤其藩籬抑將傾夫堂室莽操之事  
前鑒甚明惟陛下力斷行之書至文學博士方孝孺  
侍中黃觀曰燕終不罷兵矣暑雨方沴燕軍久駐大  
名不戰自困永北二平燕王根本地若密調軍士爲  
攻擾之計陽示報書往復閒度二三月號令旣集燕  
且歸援我大軍可躡其後矣君曰善乃使大理寺少  
卿薛嵩往赦燕王罪薛嵩至燕軍中曰皇帝使臣啓  
大王釋甲還燕南謁孝陵朝至暮收軍矣燕王曰噫  
是不可給三尺兒而指諸將曰有丈夫者矣因連營  
列隊馳射觀之遣之還而語之情嵩還報君曰誠如

卿言曲乃在我五月燕軍餉大名吳傑盛庸平安扼其道燕王使指揮勝入奏日有詔解兵傑等復倍先發也君亦悔曰燕王朕叔父奈何須兵哉方孝孺對曰兵戢難張也燕不罷兵長驅犯關胡以禦之君乃下勝獄召齊泰黃子澄還治兵如故六月燕將李遠領騎兵五千人衣裝如南軍入沛大焚漕船河沸魚鱉皆浮死七月燕襲敗彰德軍破瓦尖寨平安自真定向北平王使劉江還戰殺南軍數千初燕世子與其季弟高燧居守王次子高煦從軍高煦高燧弗恭於世子燕闔人儼亦數相與短世子燕王孝孺曰師

老矣漕道又絕臣聞燕父子兄弟可閒也閒世子燕  
王必疑疑必歸北平燕不得爭中原而我師通漕襲  
其後此一策矣因爲君具道世子可閒狀乃使人函  
世子書書至世子弗發封致燕王軍中高燧果令儼  
驢見高煦其短世子語未旣世子之函書來燕王驚  
曰幾殺吾子壬寅大同將房昭引兵入紫荆徇下保  
定諸邑塞西水王旋師歸援八月燕王渡滹沱次完  
圍西水使別將榮圍定與南將花英鄭琦戰峨嵋山  
下大敗南軍竟破西水還十一月遼東將楊文圍燕  
將亮永平燕使劉江抹之南軍敗於昌黎是月也皇

少子文珪生十二月太祖高皇帝實錄成燕王復出  
師南向使駙馬都尉梅殷守淮安左右府都督僉事  
徐真馬溥率偏師北出以禦之四年正月召周王蒙  
化居之京邸命魏國公徐輝祖領京衛軍援山東燕  
王使其將李達朱能覘南軍德州將葛進遇李達於  
藁城指揮賈榮遇朱能於衡水皆戰敗燕王軍繇館  
陶渡河至東阿拔之遂趲拔東平汶上降沛沛知縣  
顏伯瑋與主簿子清典史謙死焉晦北軍至徐徐堅  
壁不出燕王使軍慝之二日徐人怒渡河追北軍燕  
王馳斷其歸徑皆潰進攻宿平安躡之以精騎四萬

燕王伏二萬騎於淝待之燕將白義王眞劉江與平安戰佯却引之入淝伏起平安轉戰圍王眞數重創之十餘創眞自刎馬上平安遇王於北阪賊幾及王馬驚胡將火耳灰之銃亦距王十步之內燕胡將信射蹄火耳灰馬乃擒焉戰之夕燕王夢厄於平安有白馬將自西馳斷安馬足問焉對曰臣萃之神也四月北軍斷徐餉道轉攻蕭至小河燕將陳文橋河衝守之都督總兵何福引兵循河而東遇燕王騎斬文奪所守橋燕將張武突出林閒與王合乃擊却南軍南軍據橋南北軍據橋北相持累日魏國公輝祖來



援陣齊眉山下與燕大戰自午至酉兩軍相當輝祖  
斬燕將斌等十餘人還營掘堦於是南軍再捷北軍  
再敗燕諸將皆懼說燕王曰軍深入矣暑雨連縣淮  
土蒸濕恐有疾疫小河之東平野多牛羊二麥將熟  
若渡河擇地休士息馬觀釁而動可持久也燕王曰  
兵事有進無退勝形成矣而復謀退士不怠乎公等  
所見拘讎耳今日欲渡河者恣公等所之朱能曰諸  
君勉矣漢高十戰而九不勝卒有天下蓋燕王於是  
不解甲者數日南軍樹碑相慶也廷臣有曰燕且北  
矣京師固不可無良將帝因召輝祖還何福等無援

乃引兵會平安靈壁平安以六萬人爲方陣果餉護  
行燕王遮之平安突至殺北軍千餘矢如雨燕王麾  
兵斷南軍爲二南軍大敗何福出壁與平安共殺傷  
北軍北軍乃却而高煦又以其伏至王還掩擊其後  
復大敗南軍盡得其餉輓福入壁壘門私令士曰旦  
聞砲三而突圍燕王望見之曰南軍其遁旦使諸軍  
緣壁入之發砲三南軍謂其砲也爭開門遁已知爲  
北軍皆大亂平安陳暉等三十七人禮部侍郎陳性  
善等百五十人皆見執燕王謂平安曰淝河之戰公  
馬不驚何以遇我曰曩臣不佞敢效鉛刀燕王曰壯

士五月楊文以兵十萬自遼東南下與鐵鉉合勢絕  
北軍至直沽遇燕將宋貴皆戰死燕王至泗泗守將  
景初以城降王曰不戰而降何憊也景初曰泗有神  
民禱焉曰降吉其日王謁祖陵將渡河盛庸軍淮南  
燕王軍淮北王使士機舟編筏若涉者潛遣丘福朱  
能等濟淮而西鼓出庸後庸軍大驚遂濟下揚州揚  
指揮王禮執其守將崇剛御史彬降高郵通泰諸州  
皆潰遂底江北詔曰燕禍日深旦夕犯闕中外臣民  
能不獎予文武吏士宜剋日勤王予出於苦不忘爾  
報詔下臣民聞之無不慟哭者乃遣禮部侍中黃觀

國子祭酒張顯宗翰林修撰王叔英分道徵兵而齊  
泰黃子澄亦皆四出方孝孺曰事急矣許之割地猶  
可以待勤王之師乃使燕王從姊慶成郡主見王軍  
門王哭曰忍心至此乎我父陵土未乾我兄弟頻見  
殘害讒臣之言如漆投膠懿親之言如水洒石今日  
之來豈得已哉郡主亦泣下因問曰周王安在曰召  
還矣未爵也齊王安在曰猶囚燕王嗟唏不勝郡主  
徐以君言告王王曰凡所以來欲得奸臣耳皇考所  
分吾地尚不能保何望割也六月癸丑燕王軍至浦  
子口盛庸等迎戰大敗之燕王幾議割地和會高煦

搏胡兵至大喜盛庸軍緣江上下待王高資港乙卯  
王渡江及岸高煦先登王麾精騎繼之庸軍大潰追  
奔數十里都督僉事陳瑄以舟師降遂入鎮江鎮江  
人望見海船之黃幟曰海濱應矣則皆降庚申王進  
次龍潭君急而悸方孝孺曰今城中勁兵二十萬城  
高池深糧食充足尚可以守請下清野之令城西南  
隅崩築未竟又崩其東北方孝孺曰終無如割地郡  
主婦人耳若使大臣往或庶幾焉今天下惟蜀王不  
背朝廷其地四塞決死不利則收士幸蜀萬一可圖  
也君乃使曹國公景隆尚書茹瑺往燕王軍命諸王

開諸門景隆喘至伏地叩頭而已燕王曰勤勞公等有言乎景隆稍稍及割地事燕王笑曰公等游說邪初吾無過輒坐大不韙削辱之今抹死不贍曷以地爲吾故有地矣凡所以來爲奸臣耳景隆瑞還報命君再使諸王與之偕曰奸臣逐矣執而得之且用釁鼓癸亥王見諸王涕泣相勞竟曰欲得奸臣諸王還報君會羣臣慟哭或勸君幸瀾江或曰不如從湖湘入蜀孝孺請堅守待援議不決乃遣魏國公輝祖開國公昇分道禦戰甲子出蠟書促勤王燕盡獲之軍薄都城徐增壽謀爲應大理丞鄒瑾御史冕知焉與

同官十八人者毆增壽殿前呼聞大內君拘增壽禁  
中乙丑燕王至金川門下谷王穗從城上望見王鉦  
鼓與景隆開門迎入王馳千餘騎衛周齊二王周王  
曰吾死矣曰燕王之騎兵也乃喜入見拜且哭燕王  
亦哭已竝轡握手登樓相慰藉君手劒斷增壽腰排  
徊無所出乃火其宮與馬皇后自燔死燕王望宮燄  
使中使馳抹不及還白燕王哭曰小子何啖吾來輔  
爾耳遂爲發哀治喪越三日卽皇帝位是爲成祖乃  
復周齊二王爵下令建文中所改易洪武政令條格  
悉如其故稱其年爲洪武三十五年稱帝建文君越

四日禮葬之遣致祭輟朝三日又七日遷興宗孝康  
皇帝主陵園仍稱懿文太子宫之焚也太子文奎不  
知所在文奎方二歲送中都廣安宮降封吳王廣澤  
王居漳州衡王懷恩王居建昌徐王敷惠王從母呂  
氏居懿文園追封徐增壽武陽侯居頃之以廣澤懷  
恩二王不能匡輔建文俱免爲庶人改封敷惠王爲  
甌寧王或言高祖始嘗問後嗣事於劉基知建文君  
不終與之藏函函一僧牒一剃七一緇衣牒曰楊應  
能宮之火也建文君削髮披緇懷牒從御溝出郊壇  
亡成祖使中使抹宮中使出馬皇后之燼曰建文君



遂以葬之建文君既葬或言其亡或言蜀王迎之西  
皆參差莫實成祖亦心疑之其時有異人張玄玄者  
以術重已去莫知所之乃使禮部尚書浚行天下名  
訪玄玄實私察建文君竟莫得其要領其言建文君  
亡者謂羣臣多爲僧而從之入湖湘四川雲南最後  
往來廣西貴州蠻峒八番響木瓜諸處漸會集者三  
十六人三十六人事建文具君臣禮人見所誦經皆  
尚書古文英宗中建文君年八十餘矣出自雲南直  
入布政司堂南向跣趺坐地曰我建文皇帝也朝使  
求張玄玄天下而實爲我彼傳四朝事定矣老夫不

言一束遺骨更瘞何地耶有司驚致之朝莫辨也有  
閹老矣逮事建文君知其左趾有黑子摩視之持其  
踵心謂是而不敢言下錦衣不數月卒葬西山不封  
不樹云

名山藏卷之六

臣何喬遠恭輯

典謨記

成祖文皇帝

成祖文皇帝御諱棣太祖第四子也

臣於南京見太常志云帝爲碩

妃所誕生而玉牒則爲高后第四子玉牒出當日史臣所纂既無可疑南太常職掌相沿又未知其據臣謹備載之以太祖分王諸王以燕元舊京近虜擇可俟後人博考

鎮服者居之以封上洪武末年使諸王出塞捕虜燕晉二王壯而近常被命同行獨上深入有功嘗一擒虜酋乃兒不花再擒酋將孛林帖木兒等數十人虜

自是不敢近塞上狀貌奇偉美髭髯英武寬仁豪傑  
樂用其精熟武事老將皆謂不及也太祖以威武治  
天下心柔太子注意上涼國公玉時進間太子曰主  
上諸子中殿下度誰最愛者太子曰莫若燕王玉曰  
臣亦知之臣聞望氣者言燕地有天子氣殿下審之  
太子曰燕王事我甚恭久之太子薨太祖益屬意以  
學士劉三吾對立太孫太孫慮諸王太盛既卽位聽  
齊泰黃子澄計未改元而遷周王雲南拘齊王京師  
改元而湘王自焚齊王廢代王幽岷王流遂日夜防  
燕建文元年六月授密詔北平都指揮謝貴逼園王

城柵斷端禮門四門路殺王城卒七月且逮上都指揮張信密以告上遣朱能覘之還報曰球死於頸不可後也上乃用張玉朱能言擒謝貴及北平布政使張昂上書建文君請遵高皇帝祖訓起兵誅泰子澄二姦臣建文君不報遂起兵去其年紀但稱元年於是以丘福張玉朱能爲都指揮僉事擢布政司吏李友直本司右參議而布政司參政郭資按察副使墨麟都指揮同知李濬陳恭等皆從上

郭資字存性武安人洪武十八

年進士改庶吉士授戶部主事遷北平左布政使永樂初論居守功進戶部尚書仍掌布政使事賞資視伯已改刑部復改戶部仁宗即位加太子太師蹇義夏原吉數短於上謂資偏執常格恩澤請罷資上問

以語楊士奇曰先皇興義旅及吾昔居守皆得資力  
其人亦材且危而任之安而棄之吾誠不忍士奇對  
曰故舊不棄此皇上盛德願資彊毅人毋得于但詔  
勅所歸臣資必責有司依歲額徵此太過誠如二臣  
言上曰吾在此復有原吉與同事彼雖偏執莫能行  
也已竟罷政賜璽書歸踰月上念之不已命戶部給  
半俸復其家章皇嗣位起爲戶部尚書免朝謁資視  
事勤雖大風雨不避僚吏敬憚所居頽垣朴舍卒之  
有家無餘貲年七十三上諭將士曰我國家至親受  
追封湯陰伯諡忠襄

祚以來守法循分爾曹共見少主信任姦臣殘害骨  
肉削奪五王又及於我高皇帝后創業艱難封建諸  
子以嗣以續皇天后土實則何辜吾義與姦臣不共  
戴天矣言已垂涕將士感動風雨四起咫尺昏昧少  
焉東方雲開露青天尺許有光燭地映徹上下將士

皆喜謂上得天一戰而奪九門再戰而破壩上三戰而火白溝四戰而拔滄州五戰而蹂夾河六戰而得藁城七戰而掩靈璧凡七大戰遂涉泗濟淮克盱眙下揚州渡江取鎮江至金川門谷王穗開門以迎王師上按兵入建文君燔宮赴火死四年六月乙丑也丙寅諸王羣臣請卽天子位三勸進已已謂孝陵歎獻感慕攬轡回營諸王羣臣備法駕奉寶璽道迎遮擁登輦軍卒耆老萬衆夾道拜頰懽呼稱萬歲遂卽位初建文時有道士譚于途曰莫逐燕逐燕日高飛高飛上帝畿已忽不見至是驗云復周王橐齊王棹

爵土政繇洪武之舊召用洪武舊人稱今年爲洪武三十五年凡從征靖難之臣遷叙有差戮齊泰黃子澄方孝孺等於市秋七月壬午朔大祀天地南郊還御奉天殿告卽位大赦天下以明年爲永樂元年甲子享太廟楚王禎來朝遷孝康皇帝主陵園仍稱懿文太子降封其三子吳王允熲爲廣澤王衡王允燧爲懷恩王徐王允熾爲敷惠王上曰朕初舉義用清君側姦臣數人旣已伏誅嘉與萬方同樂至治比聞在京軍民未喻朕心轉相扇惑夫是皆高帝遺黎吾入城之日市不易肆今豈濫及無辜兵部急諭之賜



在京諸王書往與諸弟各一方歲一見或數歲一見  
今早暮來聚甚愜于心暑可三日一朝勅諭諸將士  
曰朕舉兵靖難爾輩多功所司上狀未詳以故未賞  
昔中山王從高皇帝混一天下二年以後賞典方行  
今踰月爾輒憤後時不已急乎向在兵間小捷必報  
豈當大定乃遂忽諸業勅所司亟上誤許陳改上曰  
朕居藩邸深知民艱數年兵興北方罷甚前工部尚  
書嚴震直戶部尚書王鈺應天府尹薛正言其分視  
山東西河陝以利病聞勅諭都督陳珪等曰朕長子  
居守北平爾善輔之申明天子誥讀大誥三篇遇鄉

飲講解如舊八月詔曰朕皇考受天明命奄有四方  
褒厚親親爰及異姓允攸不孝不仁立未三年骨肉  
幾盡周王奉藩匡輔無愆空宮籍財害其相屬王自  
歸京師竄之瘴蠻父子殊方幽囚窮窘穴牆通食謀  
構湘王闔宮自焚加以惡謚執齊王於京師囚代王  
於大同幽岷王於雲南宿夕思惟不盡不饜復以懿  
文太子薨逝之時皇考有意立朕尤所猜忌聽信姦  
臣縱兵相害朕不得已舉事自救荷天地祖考之靈  
兵至畿甸索其奸頑允攸慚負自焚以死諸王臣民  
尊朕爲帝重念骨肉之親良深存沒之感是用復封

周王河南齊王青州治湘王墳廟賜諡曰獻脫代王  
岷王囚幽封爵如故封秦愍王子尚烱興平王尚烱  
永壽王尚烱定安王晉恭王子濟熿平陽王濟煥廣  
昌王周王長子有燉復爲周世子有燠汝陽王有烜  
順陽王有熿鎮平王有拂宜陽王齊王子賢烱樂安  
王賢煥長山王賢寔平原王於戲天有顯道應捷影  
響衍本支于百世資磐石於萬年名秦王烱代王桂  
代世子遜煥來朝晉王濟熿來朝上得建文時奏章  
千餘通使侍讀學士解縉等閱其干犯者悉燔之既  
從容問爾等皆宜有衆未對修撰李貫進曰臣實無

上曰爾謂無忠耶朕非惡盡心建文者惡其導之壞  
祖法耳事建文忠建文事朕忠朕不必曲自覆九月  
大封奉天靖難諸將丘福淇國公朱能成國公張武  
陽城侯陳圭泰寧侯鄭亨武安侯孟善保定侯火真  
同安侯顧成鎮遠侯王忠靖安侯王聰武城侯徐忠  
永康侯張信隆平侯李遠安平侯郭亮安成侯房寬  
思恩侯徐祥興安伯徐理武康伯李濬新城伯故張  
玉子輔信安伯唐雲新昌伯故譚淵子忠新寧伯孫  
巖應城伯房勝富昌伯趙彝忻城伯陳旭雲陽伯劉  
才廣恩伯茹瑞忠誠伯王佐順昌伯陳瑄平江伯王

寧永春侯曹國公李景隆特進增祿諭卽位於安南  
暹邏瓜哇琉球日本西洋蘇門答刺諸國定功臣死  
罪減祿例申明木鐸教民之令是月肅王模蜀王椿  
慶王櫛來朝第三子郡王高燧來朝周世子有燬自  
雲南來朝十月中明洪武中所定禮制度數頒示中  
外脩高皇帝實錄谷王橧之國甘州衛軍張真上書  
言事上曰戌卒能言賜衣一襲鈔千貫是月寧王權  
楚世子孟烷慶成王濟炫來朝十一月清理釋道二  
教丙戌新作奉先殿成享五廟壬辰冊立徐皇后免  
廣澤王允燧懷恩王允燧爲庶人勅諭兀良哈韃靼

野人諸部曰今天下一家邊將言爾諸酋長誠心歸  
向朕用嘉之特令百戶裴牙失里勅諭爾其各居邊  
境永安生業商賈貿易一從所便欲來朝者與偕至  
是月岷王榘來朝高平王濟燁長山王賢煥來朝十  
二月勅諭功臣曰古人君以武功定天下者必賴將  
臣之力厥後往往不能保全何故哉處高位者易驕  
縱犯刑法者多怙終人君代天理物豈容私其間哉  
所以罰加焉必也高皇帝立法垂憲欲世世行守功  
臣有犯罰戒再三戒之不改乃按誅之至親且舊不  
敢曲原志人君子莫不謂高皇帝英明果斷上畏天

命下畏民情也爾諸功臣昔受高皇帝厚恩今事朕朕欲爾等悠久共富貴若復驕縱怙終不問則違高皇帝成法問而寘諸法必謂朕寡恩今錄高皇帝戒勅申明布告尚永遵之爾之不遵後悔無及上曰公侯歷事皇考者今皆年邁朕不忍勞非見任事者其令以朔望朝參詔求懷才抱德之士江西以儒士軒伯昂應詔卽擢爲山東布政司左參議上問兵部尚書劉儁天下畜馬幾何儁以數對上曰古者掌兵政曰司馬問國君之富則數馬卿嚴督所司用心孳牧是月寧化王濟渙永和王濟煥壽昌王孟焯來朝

永樂元年正月勅曰朕惟天德好生人君承天愛人而已夫與圖之廣非一人獨治自古帝王與賢共之我太祖皇帝受天明命勤愛保養生息三十餘年政教敷明近古鮮儷亦惟任天下之賢理天下之務旁求民隱宣通德意用厥臻茲朕靖難承統重惟天下皇考天下軍民皇考赤子卽位以來夙夜匪寧爾諸文武臣體朕斯懷毋怠毋忽毋虐毋貪毋爲倍尅毋縱詭隨持爾廉平秉爾正直勵爾公勤擴爾忠恕共守成憲毋或有違惟民出稅賦以贍軍惟軍執干戈以衛民軍非民不養民非軍不安惟爾文武羣臣互



爲保愛無有侵害惟皇考成憲實萬世治安之具遵  
之則吉違之則凶其悉心一志敬之慎之羣臣請立  
太子不允甲午月食陰雨不見禮部請賀不許禮部  
尚書李志剛等請遵高皇帝中都之制立北平布政

司爲京師制曰可其以爲北京

李綱字至剛以字行華亭縣人嘗從學楊

廉夫爲詩文有清思洪武戊辰舉明經奉命侍懿文  
太子授祠部試郎中坐累謫戍邊召還爲虞部郎中  
陞河南右參議建文中陞湖廣左參議成祖卽位有  
言其才遂以爲通政司右通政命與符洪武實錄朝  
夕在左右道說洪武中事甚親密其冬陞禮部尚  
書時所疏叢餘降儀制郎中然遇剽務必屬之初  
終經公三劾素相厚成祖御書大臣十人命品評籍  
於至誠則云誕而附勢雖才不端既縉遭譖出至剛  
懷恨以言其怨望中傷之後召下獄并下至剛仁宗

嗣位念其舊宮臣復以爲左遷政數月又念其老不  
任朝參改知興化府時朝廷方需仁澤於天下至剛  
勞心撫綏郡民德之再歲歿於官 二月設北京留守行後軍都督府

北京行部北京國子監改北平府爲順天府北平行  
太僕寺爲北京行太僕寺嚴誣告法分命監察御史  
巡視民瘼於天下諭韃靼可汗鬼力赤書曰比聞北  
地推奉可汗特遣齋織金文綺四端致朕意可汗能  
遣使往來同爲一家豈不美哉并勅諭虜太師右丞  
相馬兒哈咱太傅左丞相也孫台太保樞密知院阿  
魯台等賜文綺各二命三法司五日一引奏罪囚會  
官覆審承天門如洪武中故事命所在官司瘞中原

江淮之被兵者三月羣臣請立太子不允令諸郡王  
長成者權住王府近州縣講讀詩書習練弓馬以通  
世故四月勅曰朕賴天地宗社之靈父皇母后之佑  
以有天下凡更改父皇之成憲濁亂父皇天下之奸  
惡悉就誅戮其餘文武官員仍用無疑陞賞黜罰從  
至公而已昔唐太宗撥亂反正貞觀盛治近古罕倫  
求其故則太宗善用天下之賢釋王珪魏徵之嫌怨  
舉李靖尉遲敬德於仇敵用房玄齡杜如晦於異代  
宋太祖起甲冑平列國與世休息開三百餘年洪基  
亦惟其時信任前朝舊臣范質王溥石守信王審琦

等夫是二君尚借異代况朕父皇之臣非讐怨他人之比近有無知小人尚懷疑慮居閑妄生異議處事則不盡心此不明朕推赤之意不達天命者也夫人君代天理物故曰天子奉行天命故曰天吏若無天命有力者皆得爲矣元有天下廣土衆民國富兵強孰得勝之天命一去羣雄竝起爰統一于我高皇我高皇又用其才釋怨錄仇所以創業垂統身致太平今朕豈敢違天命與父皇之德法度者父皇法度朕不敢私也盡忠於國雖仇必賞心懷異謀雖親必誅今敢有不思高皇帝之恩妄分彼此懷疑怨謗不安

職事者事發族滅以浙西諸郡水命戶部尚書夏廉  
吉往治周王禴請立太子不允楚世子孟烷周世子  
有燬蜀世子悅燦平陽王濟燠永安王孟烱順陽王  
有烜長山王賢燦皆來朝賜楚王禎書曰別來思念  
世子至具知安好天下初定勞困未甦兼以蝗旱相  
仍正當養民而休之今後宮東宮燬于建文兄姑安  
焉賢弟言府中損壞欲求脩治豈有愛也民安歲豐  
乃量爲之今用護衛士聊葺而已禁金銀交易以通  
鈔法犯者准姦惡論以代王桂擅興土木命自今王  
府非朝命不得擅役一軍民私斂一錢物靖難之起

也北京及通州以婦人守埽至是上追念之命兵部錄姓氏行賞五月賜秦王尚炳書前令諸郡王出居近州縣練習講讀念四方水旱蝗蝻道殣相望脩葺供億勞費軍民勅至且令在國成造居室其卽日罷又聞晉王濟熈令有司二十里設一火燎橋梁道路悉皆治除今何時也勞民如此乎遂書戒晉王亦如之勅北京刑部尚書郭資曰卿統長六曹悉心殫慮措置糧儲尤爲樽節比聞小人或加怨謗古云省已無讐奚恤人言卿朕素知尚懋忠勤以副眷倚勅陝西都司布政司曰近令兄弟諸子出居講讀習練且

令權住衛所衙門比聞有司毀完造新採木伐石使  
軍民不得力耕而休伍夫天下軍民連年死戰鬪苦  
蝗旱疲轉輸朕甚憫之是以首詔中外申嚴所部無  
擅取一毫無擅役一夫卽朝廷亦有用民時如城池  
顛闕築鑿不繼後費將大近於洛陽改造周府殊不  
得已蓋以河決爲先事諸王權住是豈不得已重勞  
軍民寧助朕爲治意耶勅到便罷阻者繫京處以極  
刑遷家於化外再封靖難諸將之未論功者袁容廣  
平侯李讓富陽侯李彬豐城侯陳懋寧陽伯王通武  
義伯王友清遠伯陳賢榮昌伯張興安鄉伯陳志遂

安伯上曰此見朝班黥刺在列雖朕用人新舊無間  
官儀未肅其下羣臣議羣臣上議請洪武中犯黨逆  
并黥刺及仕建文者發配所縣姦臣齊黃進者罷爲  
民上曰過矣皇考作養人材以遺子孫雖縣姦臣進  
竟爲姦臣用犯黨逆者發原配所黥刺者罷爲民勅  
北京行部曰昔高皇帝既定天下念江南五府勞於  
供餽優恤絲賦朕舉兵靖難北京民出丁力以助征  
輸家財以益軍朕亦未嘗忘可覆實諸都縣以其名  
聞六月以久雨命侍郎李文郁等佐尚書夏原吉相  
度被水田堪種者趣種之後時者除今年租稅丁已



上高皇帝高皇后尊謚詔天下頒諸夷外國諭翰林  
侍讀學士解縉等曰天下古今事物載籍極博韻府  
回溪二書擷摘尚略朕欲自書契以來經史百家至  
于孤方小道類爲一書統之以韻俾考索如探囊爾  
等如朕意諭兵部臣曰漢文帝時閭巷有馬千匹爲  
羣其聽民畜私馬賜鞶鞶可汗凡赤書曰有天下  
者必得天命非人力也宋失天命元世祖得之嗣後  
荒縱民散政乖又復失之我高皇帝削平禍亂統馭  
華夷豈人力也哉朕承天休入正大統重心帝王以  
天下爲家遣使者報書幣可汗當知天命廢興之故

講好脩睦乃聞竊有覲覲古云順天昌逆天亡可汗  
博古知今寧不鑒此再書諭意并致儀物可汗審之  
遺繒綺表裏各二仍賜所部馬兒哈等各一辛卯月  
食周世子有燉來朝八月禮部言鹵簿中宜有九龍  
車一乘又舊有鉦紅鼓各四面魀燈紅油紙各三對  
今闕請增上曰先朝審禮精矣子孫遵用當自朕始  
豈可輒益以啓後奢蓋闕者增補無者如故始命內  
臣齊喜提督廣東市舶九月諭中外羣臣曰爲君難  
爲臣不易創業難守成不易剛柔寬猛適其中禮樂  
刑政有其序唐虞三代至漢唐宋率繇諸道是故舜

清問下民報虐以威誅四凶舉五官明五刑然後無  
爲恭已神禹承之無間可議夏桀之亂民從其暴成  
湯之興兼弱攻昧貶亂侮亡肇修人紀用革憚淫旣  
奠四方子孫承之惟監于成憲殷紂之亂商俗靡靡  
周公相武王誅紂伐奄遷殷頑民滅國五十繼相成  
王制禮作樂垂拱仰成刑措不用漢承秦亂高祖令  
蕭何定律令韓信申軍法張蒼定章程法令嚴明惠  
帝清靜至于文景除挾書已肉刑務崇寬厚唐承隋  
未諂諛汰侈暴慢成風高祖定官制頒律令行相庸  
調法沙汰僧尼道士勲臣犯法無所假貸太宗貞觀

之後懲斬趾禁鞭背刪定律令變重爲輕力行仁義  
幾致刑措宋興承五季之亂太祖太宗頗用重刑糾  
繩姦慝躬自折獄務底明慎立法制嚴用法情恕咸  
平以後剛其緊密益務寬仁子孫承之含弘光大恭  
儉純誠未嘗殺一不辜此歷世守成創業之事剛柔  
寬猛禮樂刑政厥中厥序莫不遞用朕太祖高皇帝  
天錫大聖之資以當非常之變奮自布衣撥亂反正  
比三代漢唐宋創業之時又大相遠蓋中華禮樂化  
爲左衽沈浸百年陵夷已甚高皇帝服古人所未易  
服齊古人所不能齊兢兢業業勞心焦思晝夜圖惟

經權常變不得已而用刑特權時之宜耳及其立爲典常先議定律損益更改十年乃成復惟祖訓傳之子孫墨劓刵宮竝禁不用欽恤之意已著象刑權時之宜不爲常法常法之立不易禮樂之用彌彰朕克遵成憲佩服聖謨思守成之不易念刑措之尤艱昔者唐虞三代君臣之間責難訓迪紀於詩書今朕告教爾文武羣臣爾惟聽之職曰天職民曰天民工曰天工祿曰天祿皆非朕私惟羣臣相朕以彰天命以奉天討以亮天工保茲天民以享天祿善惡吉凶實惟影響可不敬哉爾惟盡心勿謂忠有餘爾惟盡力

勿以勞自伐爲名而善善無成計利而勤勤必怠廉  
不怨貧以廉爲常行勤不羨逸以勤爲定分事有繁  
簡各安所遇位有崇卑各體所處爾羣臣當知也毋  
朋比朋比必淪胥毋利口利口必傾覆毋奸欺奸欺  
必暴露毋怙終怙終必殄絕依阿尸祿位者昧理擅  
權作威福者逆天貪污恣情慾者速戾讒說殄行惑  
衆志者自刑爾羣臣當戒也刑者輔治之具自古聖  
帝明王及朕皇考所甚重不敢輕不得已而用之者  
也輕重毫釐之間禍福死生之決也爾或不戒臨民  
治獄恬不加意甚至信讒說執偏言深文誤良善納

顛倒是非作威眩曲直自作聰明發摘瑕類法外求情致人以死鬼神所見甚可畏也朕爲此懼申懇日勤審克之際罪疑惟輕乃有懷殘忍之私遵酷吏之軌謗朝廷之寬恤惑上下之人心所謂利口必至傾覆爾惟戒哉聖人用人不求其備誠以才有高下智有淺深事皆盡善上智所難動靜云爲豈無過誤朕惟念此每加寬容乃有恃茲屢造非彝常懷幸免不知忽微之過豈可積多非分之恩豈可常得所謂怙終必至於殄絕爾惟戒哉亦有柔奸隱慝厚貌深情黃綠扳結請托行私僥倖圖爲附下罔上不感天子

而感權臣寧負公門不負私室同惡相濟同勢相保  
邪惡同讒以陷忠良同爲奸宄以匿其非同幻譸張  
以護其短同側媚以相師同諂諛以相悅所謂朋比  
奸欺必至於淪胥暴露爾惟戒哉亦有身爲執法賣  
直沽恩謗人感衆起險言以眩衆滅公義以濟私所  
謂讒說殄行唐虞所望爾惟戒哉亦有愧赧于中自  
懷疑貳本無勞績妄自驕矜居寵弗畏因人毀譽從  
已喜怒生殺與奪陰狠自肆所謂擅權作威福貪汚  
縱情慾爾惟戒哉其旅進旅退依違其間候朕顏色  
同進諂諛甘言遜志無所建明尤朕所惡所謂依阿



尸祿位亦恐獲戾于天爾惟戒哉於戲忠臣爲國至  
於忘身鄙夫事君但知利已朝廷機務恥給目前生  
民休戚略不加意債事蔽賢偷安玩日甚或微勞未  
報自負如山小譴或加中懷憤怨是自不恭於臣職  
豈能共致於雍熙朕務宵衣旰食豈爲惡逸好勞爲  
上帝之監臨守皇考之基業實資爾羣臣輔成治化  
上荅天命廸朕之戒時乃之休至於刑罰尤悉乃心  
考之於書屢致其意誠以民命至重鬼神難欺譬之  
操刀而割尚有血指之虞當食而言或至吻傷之失  
事雖切已未免過違心有不容視而不見毫釐之差

生死之決一往不復雖悔何追朕寤寐思之不自知其辭之復也爾體朕心無怠於意必欽必慎惟明惟恤俾寬不至縱嚴不至殘囹圄空虛刑措不用政教修舉禮樂和平家國有萬年之安爾亦有無窮之舉子孫黎民尚有餘慶戒之勉之朕言不貳欽哉勅吏部曰任官圖治之基也求賢任官之本也高皇帝聖德光華萬邦黎獻共惟帝臣肆朕眇躬克正大統永惟萬幾不敢暇逸思欲旁招俊乂光輔邦家必明目達聰以弘視聽內外諸臣尚體朕心於羣臣百姓之中各舉所知無閒遠邇並以名聞書曰舉能其官惟

爾之能舉非其人惟爾不任古訓具存爾其懋哉上  
謂侍臣曰皇考功德隆盛宗廟樂章未有稱述朕甚  
媿焉博採名儒而議爲之稱朕稽古禮文之意上謂  
侍臣曰朕宮中丙夜坐閱圖籍何郡罹饑荒何郡迫  
邊鄙旦與羣臣計議行之河南數處蝗旱朕用不寧  
使者省視不絕於道如斯民小康朕之願也賜禮部  
尚書鄭沂戶部左侍郎嚴奇良通政司右通政丘顯  
誥勅致仕陞辭賜宴上顧禮部曰是皆皇考舊臣自  
今舊臣老致仕者禮之視沂母得有貶鄭沂字仲與  
浦江人義門  
七世孫也父卒與兄溪方嚴寒袒跣哀號永新令趙  
大納哭弔奉以草履與兄俯伏慟哭辭謝不受洪武

三十五年宣召義門子弟年三十以上者至御前備  
擢用沂與焉三十年又徵取大姓賢能者上特召沂  
前語曰爾家大孝大義前朝雖嘗仕宦我今大貴汝  
御筆親除爲禮部尚書持新制大理寺沂會同審囚  
無有枉濫太祖賓天與祭禮畢卽引年致仕歸成祖  
思念舊臣召授前職三月憫其衰特製詔命賜歸已  
入朝復有賜鄉人誣告義門私造軍器朝命搜索無  
有以舊紅漆器生罪罪家長濶沂曰家長濶昏耄無  
聞知某嘗爲禮官不能使家衆遵國法罪生某兄弟  
再三尋事聞家宥仍賜冠帶還鄉北巡召致仕老臣  
南京聚會同館待以優禮五日一朝東宮沂爲領袖  
駕還錫燕東歸將卒呼二子杓槃來前曰吾賴天子  
寵光祖宗德澤白衣接以尚書今年踰七十考終幸  
大矣爾等當圖報效言畢忽風雨大作頃焉風靜雨  
止條然  
而逝  
十月上謂六科給事中曰四方蝗旱民之艱  
食宦寺服食朝廷乃有畜養鷄牲靡費食米者此輩  
坐享膏粱暴殄天物論其一日養牲之費當饑民一

家之食業行禁戢爾等識之再爾不宥大理寺卿薛  
鼎等奏天下布政司所上死獄請遣御史分決從之  
命都御史陳瑛授御史簡書慎刑之意臨決之時苟  
有可生卽與辨釋上謂侍臣曰有言朕法令太寬者  
夫治人如醫有是病則服是藥不反傷矣朕守成之  
日正不敢傷民之時無病服藥朕不爲也勅建昌府  
同知馮士成等二十六人曰爾等事我皇考舊矣建  
文中罷斥爲民亦有不當罪者朕思任舊人仍召爾  
至方今官備爾且歸家念皆蒼頭皓首弗欲重勞特  
賜冠帶仍爾舊職歸尚撫爾子孫率化爾鄉人子弟

因賜道里費有差命侍臣輯古人嘉言善行有裨君道者以授長子而諭之曰朕少寓鳳陽民間細事靡不究知受命北平經絕塞冒霜雪與士卒同甘苦身所未歷則博考載籍覽鏡昔人之言行今長子居守北平雖吏案奏牘亦令躬閱以知爲臣之難他日可爲君也慶成王濟炫來朝勅晉府長史龍潭等曰古人臣無私交王府與西番往來以私車遞送王年少不知古長史儒者謂不知乎廷臣欲朕法爾朕姑不問尚慎戒之兵科給事中言天下衛所官吏所進軍馬文冊或額數盈朒或姓名舛異或不用印信或名

不稱臣或不著年月日皆不敬當治罪上曰人精神有限案籍繁勞或短計數或成追促姑條詰之更令詳進高平縣吏告知縣斂民財市馬給遞送大理寺臣言方禁斂財宜抵死上曰禁令不許爲私也馬給遞送公事矣釋復職十一月頒大統曆并賜朝鮮諸番國著爲令錦衣衛奏死罪一人上審其情而使宥之發屯戍興州因諭刑部曰朕矜其誤人無不可與日新且國家得一人耕亦可食數人其爲例四川行都司奏越舊衛地番賊不時出沒請調軍勦捕上曰令嚴備遣撫諭之晉恭王第六子濟煥來朝初洪武

中免直隸五府民二稅每歲歲陳籍其丁壯供役名  
均工夫及是內河淤塞皆來浚治上念風雨沍寒賜  
鈔罷歸令京衛軍士次第成之仍賜鈔充僱直論六  
科都給事中朱原貞等曰天下疾苦朕恐爾曹未之  
能盡知也選郡縣考滿官假六科辦事名俾隨爾等  
在朕左右朕有問卽可知彼有言卽可達乃至今無  
一人言者夫郡邑之大無一事苦耶在朕左右而尚  
默默况遠千里退其申諭以朕意賜山西右布政使  
周璟勅曰爾擢官未替聲稱綽著慎終如始尚敬懋  
哉儀封縣知縣許譽秩滿至京縣民詣闕乞留從之



賜鈔錠文綺令復任閏十一月諭都御史陳瑛等曰  
國家設按察司糾察牧守無所不得問無所不得言  
也河南蝗旱數歲水爲民災有司不撫字甚者朘削  
之按察司官不一言其移檄切責俾采察所部軍民  
利病及布政司府州縣官賢否以聞并命通檄天下  
按察司及按治御史之在外者上謂侍臣曰朕每當  
法司奏囚未嘗不反覆思究之也毫有可生便從寬  
減蓋往在軍中未嘗輕戮一人况今爲天下主南陽  
縣言縣民逃徙賦役靡出乞下令捕歸上曰民誰樂  
去其鄉哉河南連歲水旱蝗螟守令鮮撫字之夫其

出廬生業已廢棄捕歸益之困耳封胡奎爲安南國  
王上顧侍臣曰北京山西寧夏一時地震朕心惕然  
爾言其故侍臣對曰兵戈土木應也上曰比年兵旅  
饑饉民困甚矣朕夙夜圖之朕避暑樓居武門端門  
而已後宮墊隘不敢增修慮土木也若云兵戈政當  
勅邊修備十二月翰林侍讀學士解縉等奉勅脩古  
今列女傳成成高皇后志也封贈靖難公侯伯三代  
及妻如舊制上曰爲國教民莫切守令吏部都察院  
其令巡按御史及按察司凡府州縣到任半歲以上  
者具其賢否廉貪之實以奏戊子月食上閱太祖制

集賢學士解縉等曰建文燔宮皇考所遺宸翰殊不可得朕深悼痛有散落臣民家者乎遣書諸王府遣監生分詣天下令有收藏者皆送至錄與別本而重資之楚世子孟烷來朝擢鄉貢舉人王偁爲翰林院檢討上更問吏部簡討下何官對曰博士典籍侍書待詔曰皆已除未對曰已除曰賢何如偁對曰舊博士中皆老成文學士偁初除未知上嘆曰國家用人以賢以勞偁賢既未知勞亦未有乃令賢有勞者位其下其自博士以下陞職皆與偁同詔百工技藝凡利國益民之事皆許陳奏

二年正月勅曰今春時和東作方興天下文武諸司各宜申明教術勸課農桑慎固封守問疾苦恤饑寒黽勉誠心崇寬厚之政定屯田賞罰例詔自今有犯交易銀兩之禁者免死屯戍興州禁民下海召世子及郡王高煦於京師二月蜀世子悅嫌來朝禮部引奏北方歲貢生員入學十年考不中試者當充吏上曰人心志舒泰衣食溫飽乃能進於學問北方三四年中飛芻輓粟之艱兵戈風塵之苦無怪業荒可令還補廢學年數而後再試之母連河使來朝旣辭歸上召使者前勞之縱問及田獵生事久而退顧侍臣

曰夷狄之人萬里來朝若不稍垂顧問必不附歡侍  
臣進曰陛下懷柔至矣但嚮所問皆田獵之樂未嘗  
及其人民畜產臣竊未喻上曰田獵是其性俗若問  
人民畜產彼必疑心朕方懷遠故不及也禁小秤交  
易大理寺臣得犯者請論違制律上問工部臣明禁  
否對曰文移諸司矣曰榜市否對曰未上曰未榜市  
其赦之刑科奏強盜論死有年十五以下者三人上  
曰耄悼不刑二兒去悼不遠其勿論前軍都督府言  
龍驤衛千戶妻無子妾之子代職居常見惡於妻妻  
以刃傷子足妾告妻欲殺子請竝治之上曰妻傷子

足恐無殺意使其母子嫡妾兩造獄吏之前非風化也付夫自治三月吏部奏有千戶奏薦士武人也朝命不及請坐違制罪上曰不及命慮其昧知人能薦忠心也試而果才一體授官刑部奏方禁銀交易江夏民有父死以銀買葬具者上曰禁銀交易恐鈔輕耳詩曰凡民有喪匍匐救之其赦勿治上曰朕命御史給事中撫安中外要以禁止奸慝導爲善而已給事中琰至四川見無犯者乃陰遣親信用銀誘民交易已則執之昔唐太宗以物試人待其受之則加之罪賴魏徵諫止古人以光明正大治天下苛則不堪

僞則不信脫小民畏法反執陰誘者於官曷用治之  
都察院其執琰論罪上晚朝召後軍都督府及兵部  
官皆不在列御史劾奏上曰朕命之矣有司早朝奏  
事無者治事署解中不在列必其無可奏諭六科給  
事中曰爾職居近侍比不聞一言軍民利病何也君  
資臣成治臣不輔法是不忠君可退思之條析以聞  
改封允熲爲甌寧王世守懿文皇太子祀諭六科給  
事中曰爾等疏駁奏牘一字之誤亦皆喋喋毛疵甚  
矣文書委積人之精力豈無時敝自今奏內有數日  
月日等字錯謬者令從傍改註印蓋之不必以聞麟

等奏言乃至有不稱臣者上曰下豈敢慢上或猝遽漏書亦傍增之爾等在朕左右凡天下何弊當革何利當興何所軍民未安何人奸邪未去當歷舉以言如此細故故可略也四月勅曰朕惟天下武臣犯石天冒霜雪累積功勤致有爵位或承祖父往有犯刑朕不忍遽絕其世皆謫之遠方今已踰歲其令輕者復職重者立功自贖進士李衡自訟其父洪武中受法不當違令干進上曰不聞帝王用人殛鯀興禹朕不爾罪爾其勉之甲戌冊立世子爲皇太子封郡王高煦爲漢王高燧爲趙王諸王嫡長子皆封爲世子



衆子皆封爲郡王冊皇太子曰咨爾朕之嫡長朕藩  
于燕爾爲世子聰明純厚孝友溫恭朕平內艱爾功  
居守事上恤下至仁小心茲受爾冊寶命爾爲皇太  
子爾惟夙夜祇承爲善無間一念過虧大德之累爾  
宜念之學勿至迂明勿至察嚴勿至猛寬勿至縱謙  
卑遜志容受忠良勤儉安詳惠鮮衆庶以承宗廟以  
保社稷爾其敬之諭三法司出淹獄先是命儒臣輯  
古嘉言善行將以授太子至是書成賜名文華寶鑑  
御奉天門召皇太子面授之其書比高皇帝所輯嗣  
君昭鑑錄加廣益以高皇帝之寶訓焉有官軍誣民

爲誹謗者縛送刑部獄具以聞上曰諺恒言軍強民弱必軍誣民命五府六部都察院訊實遂釋民抵官軍罪并罪刑部官之枉民者長山王賢竣來朝上朝罷召諭六科給事中曰朕可否庶務或有失中爾等直言顧解縉曰敢爲之臣易求敢言之臣難得勅諭文武羣臣曰今天下雖安民未蘇息郡縣豪猾遇有征繇竝緣爲奸細民不勝盜賊滋起爾等其悉心政務毋橫斂一錢毋妄興一役稱朕閔念元元之意更定天下衛所屯田守城軍士視地之夷險要僻臨邊險要者守多於屯在內夷僻者屯多於守地雖險要

運輸難至者屯亦多於守五月國子監祭酒徐旭書  
奏不謹當降上問吏部尚書蹇義旭何如對曰文學  
持守寡合於人上命爲翰林脩撰上曰持守之人宜  
其寡合既有文學當寘近侍庚戌以高皇帝忌晨詣  
孝陵先日錦衣衛請具法駕上曰用數騎前導而已  
顧侍臣曰皇考升遐之日正屬感慕之時自非辟道  
導騎亦可省也六月楚世子孟烷來朝乙酉月食汰  
冗官蘇松嘉湖諸郡水命監察御史督有司賑之諭  
禮部曰天下之才不盡也落第舉人或本有學問爲  
文偶劣或文故不劣試官偶遺之其再試旣試得張

名山藏

卷之六

典記  
成祖一

三

信等六十人名見賜冠帶而勉之使進學於國子命  
姚廣孝賑濟蘇松命徐景昌襲父爵進封定國公七  
月寧世子磐斌來朝山東郡縣野蠶繭禮部請賀上  
曰使山東盡繭亦僅被一方其已大理寺言有犯者  
法當黥上曰宥之人孰不可與自新墨其身且怠其  
心九月福建布政司奏有番船泊岸詢是暹邏遣使  
通好琉球因風漂至已籍船中物請命上曰鄉有善  
人猶能振人於德夷國通好不幸漂泊可利而籍之  
丹壤爲治乏食粟焉便風欲歸或往琉球卽導之去  
周王橐來朝獻騶虞百僚稱賀上罷朝謂侍臣曰適

聞羣臣之言朕烏足當之古之明主皆遇祥自警警  
怠之分安危之繫也朕敢不敬裝印列女傳給賜諸  
番謂吏部尚書蹇義等曰朕慮中外守令未必得人  
遣御史分巡考察夫入其治田野闢人民安禮讓興  
風俗厚境無盜賊吏無奸欺卽守令賢矣否卽不賢  
矣比聞御史至郡邑但坐公館名問諸生及庶人在  
官者輒以爲信夫君子中正自守小人賂遺求譽詢  
言之弊寧足憑也自今御史及按察司考察有司賢  
否皆令具實跡聞徒太原平陽澤潞遼沁汾民一萬  
戶實北京制信符給宣慰安撫等司齊王傅來朝刑

部尚書鄭賜言比軍士初犯者皆蒙宥小人作過全無戒懲上曰朕戒怙終若其初犯固可恕也刑部奏會諸司錄囚上悉召諭之曰爾宜盡心耕去莠也心有不存并去苗矣十一月上錄囚奉天門已出午門復召錦衣指揮鴻臚少卿各一人從容審問之有辭入白曰囚久困獄乍至朕前久困獄則雖枉而不求辨乍至前則畏威而不敢言刑部言靖難諸臣有罪繫者請論功定議上命論如律曰刑賞治天下大法也功不掩過私不廢公征討之功朕酌之矣過而不問私孰甚焉癸丑夜京師地震召羣臣論戒之以天

寒罷築孝陵垣牆者學士解縉等進所纂錄韻書賜  
名文獻大成復謂未備勅太子少師姚廣孝刑部侍  
郎劉季篈及縉重脩之使翰林學士王景侍講鄭絳  
副命禮部簡中外官及四方耆宿有文學者充纂開  
館文淵閣光祿寺給朝暮膳

三年正月上朝諭天下文臣曰朕惟治天下得民爲  
本保民愛恤爲先朕皇考太祖高皇帝混一輿圖身  
致太平其閒愛養生息思至慮周故天下殷富生齒  
日繁朕卽位以來仰遵成憲惟恐不逮尚慮天下之  
廣人心難一不守我皇考一定之法致陷刑辟所以

可寧告戒使人遷善遠罪凡我有官君子明聽朕言  
民國本也勿苟貪其財勿妄役其力則可常安民  
常安則天下無事矣是亦爾等所以令終而後聞也  
論天下武臣曰國家置武衛以禦侮不以世治忘備  
爾等當竭忠効力守法奉公士卒戰禦所資也其用  
心撫綏屯田儲畜之本也其加意督勸若夫完城堡  
脩器械勤訓練謹斥堠慎哨備皆軍政所急爾等爵  
祿富貴或繇父祖或出已勞當夙夜體念保之永遠  
免順天永平保定三府田租二年命學士解縉於新  
進士中選才質英敏者讀書文淵閣得二十八人以



擬二十八宿司禮監月給筆墨紙札光祿寺給朝暮膳禮部月給膏燭鈔三錠工部給居宅曰漢唐宋諸賢臣皆能以文章羽翼六經垂諸後世當使儒道之盛克見於今黃河清于蒲津羣臣獻頌建碑于孝陵伐石幕府山之陽求厥趺于龍潭山發土得石龜長尺許其文玄蒼宛然如生衆工以龜來獻羣臣奉表稱賀遂獻于孝陵楚王楨來朝二月蜀王椿來朝命趙王高燧居守北京四月以儒士馬巨江爲翰林院五經博士

巨江江西安福人與張純同輩學行老成志尚閑達上在藩邸聞其名及是召至將

用之以老固辭遂受博士賜紗帽銀帶襲衣及璽書褒諭令致仕周世子有燉寧化

王濟煥長山王賢炆來朝五月肅王槩順陽王有烜  
來朝賜周楚齊蜀諸王書曰我皇考創業垂統惟欲  
本支各盡其道朝廷則篤親親藩國則重守法朝廷  
紀綱明正藩國不齟齬其閒藩國禮節不踰朝廷不  
苛責于上吾與諸弟姪皆宜念之夫朝廷不能篤親  
是謂不孝不友不慈棄仁背義咎莫大焉昔建文嘗  
蹈此失吾躬奉藩不深戒哉天下事繁一人精智有  
限藩國當體亮本誠情外相恕比代寧秦晉永興高  
平平陽諸王稍不順意內外怏怏或聽誘爲非甚者  
怨謗鎮壓是皆少年寡學之過吾慮傷同氣悉忍不

問然皇考有法朝廷之公也朕復不言積過愈深又  
安能已繼今吾念親親之恩勿替諸弟姪念皇考之  
法具在特此遣書陳布恤款六月遣中官鄭和往諭  
西洋海外諸夷命戶部尚書夏原吉僉都御史俞士  
吉左通政趙居住大理少卿袁復袁復實應人賑饑蘇松  
嘉湖曰蘇湖被水民食他郡其令所在毋驅逐水退  
復業無糧食種子者官給之大理寺臣言文官犯杖  
近例記罪還職停俸三月蓋欲使自新乃輕玩比比  
請今論如律上曰其待三七月興平鳳翔二縣進瑞  
麥羣臣表賀上曰四方遠邇一物靡疵癘乃名太平

覽表憎媿八月申明學較之教遼王植來朝九月谷  
王穗慶王楠楚世子孟烷蜀世子悅爌來朝關陝獻  
嘉禾羣臣應制譔詩初上爲燕王時嘉禾生北平以  
獻太祖太祖御製詩賜上至是摹勒拓本賜諸王近  
臣時四夷貢使充溢脩會同館於京師驛于福建浙  
江廣東之市舶提舉司爲海外諸番館福建曰來遠  
浙江曰安遠廣東曰懷遠加封張輔爲新城侯十月  
封宋晟爲西寧侯賜滿剌加國鎮國山碑銘以祖訓  
賜諸王而諭之曰皇考垂訓子孫是書最要夫朝廷  
藩王合本同根心祖宗之心則自然各盡朕與諸王

共勉之十一月諭趙王高燧曰朕居北京廿有餘年  
每聞邊報謹守而已當時中山王武寧王亦惟嚴圍  
以無失敗爾遇烽警輒遣出視不輕率耶今宜戒之  
四年正月上謂侍臣曰朕閒中肄書愛毫穎精妙稱  
順人意因歎匠藝如此本之素治前代大儒君子皆  
是積勤造極今人學力未至便謂道難豈求道易匠  
藝也戊戌宴羣臣奉天門與宴蠻夷酋長皆起舞稱  
壽曰生居絕域獲覩天朝太平之盛死且有光上曰  
普天同樂朕心也皆歡呼稱萬歲日本國王源道義  
捕獲海寇以獻下璽書褒諭之封其國之山曰壽安

鎮國之山上製文立碑焉南陽皂君山草寇竊發命  
豐城侯彬新城侯輔率兵捕之諭曰盜故良民有司  
不字更加害之不愛其生則不得已其先之撫招及  
彬至皆潰散遂命班師六部都察院奏劾朝覲官治  
事稽違上召遣之而諭曰職天職也勤慎則張怠忽  
則廢其歸改過自新琉球國進閩人命還之禮部請  
今且留但止其再進不者慮阻化誠上曰空言不若  
實事留而止之必有繼踵來者甲辰大郊祀上覽存  
心錄顧翰林侍臣曰慕容超郊壇側出異獸隋煬帝  
祀園丘暴風不成禮德與不德皆能動天夫德者積

躬而累行蓋非臨祭而儆福上晚朝右順門百官奏  
事皆趨出召論六部尚書及近臣曰早朝奏事多不  
得盡言午後事簡卿有欲言毋謂朕倦聽又曰朕每  
旦四鼓興衣冠靜坐是時神清氣爽則思四方之事  
緩急之宜朝退省覽奏牘有邊警水旱之報卽付所  
司暇觀經史未嘗敢逸卿等宜體朕心相與淬勵西  
域進舍利禮部臣請因是釋罪囚上曰天堂地獄佛  
亦有焉梁武元順豈可效之賞功誅罪帝王大務也  
二月寧世子磐斌來朝成都等府播州宣慰等司奏  
蠲荒田賦上命戶部并除其歲額命軍官犯罪戍邊

立功者悉復之三月辛卯朔視學釋奠于先師立碑  
製文焉廣東諸處黎獐苗獠皆來朝賜賚授官勅有  
司免其賦諭韃靼可汗鬼力赤曰朕體天爲治惟欲  
萬方有生咸得所欲致書可汗謂宜通好往來共爲  
一家可汗不悟拘我使臣掠我邊境夫天之所興孰  
能違之天之所廢孰能舉之昔天命有宋歷十餘世  
而厭其德以命于元數世之後天又厭之命我太祖  
皇帝此皆天命豈人力也不然元之後世自愛猷識  
達里剌北徙以來至今可汗更七主矣土地人民增  
益毫末否古稱順天昌逆天亡况爾有衆甲冑不離



身弓刀不釋手東遷西徙老者不得終其身少者不  
得安其居今數十年矣是皆何罪可汗聰明特達還  
前使者及所掠去邊境之人用寧爾衆同享太平豈  
不美與若果必以兵朕亦不得獨已可汗審之文綺  
二表裏往致遠意永和王濟煥來朝上曰宣府萬全  
興和皆臨邊衛未冬先寒將士備禦晝夜不解甲朕  
嘗歷其處勞苦特甚大小官軍其人賜鈔五錠上試  
禮部中選舉人朱瑄等擢林環第一復親試下第舉  
人得文學優等二十一人賜冠帶授之官選未及者  
賜鈔遣還諭之曰爾等當歸務學鄉里父兄所在孔

子蓋恂恂如也尚謹子弟禮母生驕慢以蹈德凶刺  
諭海島流人曰爾等播遷于虐政畏罪久徙苟活窮  
荒特赦所犯宜卽還鄉復業譬如春冰爲水如故四  
月順天府老人以優免田租入謝命光祿寺賜酒食  
禮部予道里費面諭之曰往者北方連歲軍旅供給  
勞苦故爾特免比農種何如民力復舊否朕念一來  
恐勞困爾爾歸各勉子弟爲善而勤生皆叩頭謝因  
諭戶部臣北京耆老多有入謝者春作方興政當勤  
督子弟力於農畝况衰倦之人豈堪遠涉卽檄止之  
保安王尚煜順陽王有長山王賢峻來朝購遺書

於天下諭使者曰勿計直惟所欲士大夫尚有藏書  
况天子哉因顧學士解縉曰須覽閱乃有益上諭都  
御史陳瑛曰御史以儆肅百僚當用清謹介直之士  
不能是者悉黜之因諭吏部授御史必其人又曰百  
官小大皆必其人豈但御史有較尉許朝臣謗毀時  
政者上曰其誣命鞠之果然上曰小人敢誣君子則  
上下不相安也付治於法司五月召諭三法司曰日  
見刑部引奏有逮及無辜久繫不決至於病危其人  
無罪設若病死枉殺之矣決獄在明又在不滯今天  
氣已熱徒流以下其皆令所在發遣上謂侍臣曰君

人之道犯極惡則不宥有小善則不棄論小過而廢大善善將怠錄小才而免大惡惡將肆故惡難容者乃不論其才才可用者乃可略其過賜鬼力亦部下阿魯台織金文綺二端而諭之曰曩者丑閭回其言爾聰明識天命有歸誠之心近忽都啄木兒至又言爾母子同心歸誠有加無替自古名世之臣如王陵陳平去楚歸漢尉遲恭李靖舍隋歸唐曹彬潘美委身事宋皆懷先見之明知天命去留之幾爾明達不下古人政當決之朕當處爾善地與爾王封傳之子孫永世無窮命雲南車里諸宣慰使定孟弄灣甸等

府州三年一貢著爲例秦王尚炳來朝六月己未  
日有食之是日陰雨不見禮部請賀不許上謂近侍  
之臣曰早在宮中偶忘一事問左右皆不能舉沈思  
久乃得之朕以一人而覽萬幾能盡無遺誤日今事  
有叢脞爾悉臆之處置有悞亦須直言拾遺補過爾  
等職也南雄府獻瑞麥薦宗廟廣東布政司言南雄  
至南安有梅嶺之隔番夷方貢請用民接運上曰貢  
無定期農少暇日其令貯貢物於南雄農隙接赴南  
安復顧侍臣曰民不失養勞之鮮怨民失其養休之  
不德雲南西南夷大古刺小古刺等部落皆來朝貢

七月上視朝百官奏事退召侍臣語久之時方五鼓侍臣請曰聖躬勤勞請少休上曰朕在宮中嘗周思庶事一事未行或行未善卽不寢至旦必行乃安久亦忘勞誠念才德不逮若不專志勤思何繇政善民理也命成國公朱能佩征夷將軍印充總兵官西平侯沐晟佩征夷副將軍新城侯張輔爲右副將軍率二十五將軍討安南逆臣黎季犛季犛者胡奎也閏七月羣臣請建北京宮殿以備巡幸從之遂遣工部尚書宋禮侍郎金純古朴師達副都御史劉觀等採木於中外命泰寧侯陳珪北京刑部侍郎張思恭督

造碑瓦徵天下諸色匠作選軍民下壯期明年五月

赴役於北京來歲代古村陸人洪武中鄉貢爲太

嘉之除營部主事累武選郎中建文三年陞兵部右

侍郎永樂初改戶部右侍郎宣德中南戶部尚書終

官朴居官臨事夙夜匪懈謹守成憲無敢損益戶部

主事劉良墨其官朴下考之良墨上左右求最朴不

可良遂誣奏朴他事既就繫成祖察朴誣釋之仁宗

時吏部奏校共黜合對請其久仁宗曰豈第乎

罷祿位降良常誣奏大臣君子乎不與良竟以賦敗

師遂字九達東阿人少孤養母年十三母疾甚思

食藤花菜地不常有達去城南二十五里求得之歸

則丙夜道遇虎驚呼天虎舍達去採食菜尋愈自國

子生擢御史陞陝西按察使旬日間決淹獄以千餘

人丁憂去官廬墓蔬食水樂初台爲兵部侍郎尋轉

吏部文皇征虜命總督餽運達請量程置堡使所得

輓民不困而軍食足洪熙初進南戶部尚書兼掌吏

部事宣德二年卒達任吏部能稽詢衆論以未公當

扈從北京文皇間語左右曰扈從諸臣惟師達廉

上語翰林侍讀胡廣等曰朕曩守藩暇好觀易時府中惟武周文善爲易然時有拘滯易者易也其妙在變又曰內君子外小人一語人君用之功效不小時周文以侍讀學士請致仕陛辭賜坐良久曰卿篤學惇德宜在左右春秋高矣故遂卿請周文頓首謝命賜酒饌楮幣給傳還鄉顧謂胡廣等曰斯人操履端方上問胡廣曰中官自江西來言田家穫稻皆了此甚早也對曰臣鄉多早稻是以早穫上曰江西民衆地少農亦給否對曰勤斯給矣上曰勤之一言四民皆通人君尤要八月侍臣有言強盜劫人多減死成



邊恐法寬無以示懲上曰朕憐其初非得已又冀其終能改過勅甘肅守將宋晟寧夏守將何福山西守將吳高曰朕欲馬蕃思有二策其一欲略如漠法擇水草地其外險阻數人守之縱馬其中順適其意冬寒草枯則聚而收之其一散與軍民牧養設監牧統領之二策孰善精思條畫以聞上召通政司參議賀銀而責之曰朕於民情雖微不忽四方言事皆欲悉聞今章奏非重務者通政司但送六科不聞朕如此則何以通政爲賜趙王高燧書曰比聞駙馬都尉袁容怒都指揮款台過門不下簾楚幾斃款台靖難功

臣爾豈不知曷不聞朕自洪武來何嘗有下馬駙馬  
門之令所辱款台之人悉送京師王敦爲晉駙馬縱  
恣暴橫卒用悖逆滅亡爾令毋效之免齊王榑爲庶  
人九月晉王濟熇周世子有燬廣昌王濟熇來朝設  
陝西甘肅二苑馬寺北京二苑馬寺申嚴投匿名文  
書之禁十月免午朝上顧侍臣皆休沐一日復問寓  
舍無事寧觀書否對曰暇亦不廢上曰朕愛孔子飽  
食終日之言宮中恒觀書若等盛年切莫自逸禹惜  
寸陰何可不勉辛丑月食征夷將軍朱能卒龍州使  
右副將軍輔領其衆回回國進玉鉉却之命禮部賜

鈔謂尚書鄭賜曰朕宮中恒用薨益潔素瑩然可念也十一月庚申大薦享于高皇帝后臣庶祖考咸預其列其日甘露降孝陵醴泉出神樂觀獻宗廟賜廷臣勅曰朕敬謹事天致孝皇考皇妣普及幽靈禎祥疊見爾羣臣表賀朕不敢當斯皆上天眷祐皇考皇妣聖靈垂蔭及爾羣臣盡心輔朕協和神人之所感格朕觀自古有道之君祥瑞之來愈加警畏爾宜勉輔朕躬承天與朕皇考皇妣鑒臨之意刑部大理進月繫囚數上閱之凡數百人大辟十之一召尚書呂震少卿虞謙等曰非死刑者何今天寒淹禁雜犯死

罪以下約二日悉依贖罪例發遣之

呂震字克聲臨潼人洪武中鄉

舉入太學詞廷行天下則遠均就震云極之兩字義  
命得任使提山西按察使事入爲戶部主事尋出爲  
北平按察使事成祖潛邸恭順有勞及卽位召爲大  
理少卿尋陞大理卿進刑部尚書轉禮部成祖數自  
將伐虜震與吏部尚書蹇義戶部尚書夏原吉兵部  
尚書方賓刑部尚書吳中皆諫上不聽上怒原吉糧  
儲之對煩繁之并言賓等實聞懼自縊上命震兼領  
戶兵二部事溫諭之曰事無與卿卿但盡忠朕垣懷  
招期因令較尉十人隨震密勅曰震萬一死爾十人  
毋生也震自劾親悟悟善記每奏事他尚書皆執副本  
又與左右侍郎吏送奏震獨口奏具得其曲折事經  
震至寺議曰三記奏三記皆主專請討三部侍郎具  
位而已震從北行虜立碑沙磧中上率羣臣讀碑文  
而震能樂之居一年以上與文學臣語及碑詔禮部遣  
官往錄其文震請筆疏之上密使人至虜中揭其本  
不脫一字以此寵震甚震深中寡言當其獨坐深念  
以手指刮眉毛則必有精思密計諸官屬相諫無敢  
自事而主事戶部隆者故爲春坊中允爲東宮所重

曰震事震政獨坐不應少選復前震怒拂衣起曰君  
自行之何以問爲昌隆不得請有語以公舊事東宮  
皇太子素重公何不取令旨行之昌隆從其計事得  
行震大怒奏昌隆假官僚怙賴恩私事不關問奏輒  
取東宮令旨不之父而之兒昌隆潛蓄無君心上爲  
震下昌隆獄尋赦復官昌隆丁父憂起復謁震震外  
津接昌隆入理前奏詔繫昌隆錦衣獄籍昌隆家凡  
下詔獄者上北巡率與載以從名隨駕重四昌隆與  
焉後數年谷王謀反以王嘗保奏昌隆爲長史坐昌  
隆與講下公卿雜問昌隆力辨不服震折之昌隆知  
不可免乃服獄具上昌隆死夷其族震居禮部垂二  
十年仁宗朝加太子少師尋進太子太保宣德元年  
卒卒時病面疽宛轉病呼曰尹相尹相家  
人問故曰尹昌隆守而欲殺我震竟死  
高文雅疏白時政下禮部會議都御史陳瑛以文雅  
疏舉建文時事劾而請寘諸法上曰草野不識忌諱  
言苟可採勿遽廢罷因諭尚書鄭賜明主不罪言今

後建言者但論可用與否瑛刻薄非助朕者文雅可  
付吏部量才授官十二月辛卯大赦天下上聞京師  
民多病歎曰內府藥材甚廣咫尺不能有濟何況於  
外命太醫院掣施方劑復命禮部申明藥局之令